

**ՎՐԱՍՏԱՆԻ XVII Դ. ՊԱՏՄՈՒԹՅԱՆ ՀԱՐՑԵՐԸ  
ՉԱՔԱՐԻԱ ՔԱՆԱՔԵՌՑՈՒ «ՊԱՏՄԱԳՐՈՒԹՅԱՆ» ՀԱՄԱՏԵՔՍՈՒՄ**

ՎԻՐԱՔՅԱՆ Ա. Ս.

Թեև Վրաստանի XVII դարի պատմության ուսումնասիրությունը հիմնականում վրաց պատմիչների (Վախուշտի Բագրատիոնի, Փարսադան Գորգիշանիձե) վկայությունների վրա է խարսխված, Հայ ուշմիջնադարյան պատմագիրները ևս զգալի ուշադրության են արժանացրել Վրաստանի այդ շրջանի պատմության անցքերին: Ի տարբերություն Առաքել Դավրիժեցու, որի «Գիրք պատմութեանց»-ը վրաց պատմագիտության մեջ դիտարկվել է որպես XVII դ. Վրաստանի պատմության կարևոր սկզբնաղբյուր, Զաքարիա Քանաքեռցու «Պատմագրություն»-ը վրաց պատմաբանների տեսադաշտից դուրս է մնացել: Եվ դա այն դեպքում, երբ այն զգալի նյութ է պարունակում վրաց ժողովրդի XVII դ. Հակապարսկական պայքարի վերաբերյալ: Վրաստանի պատմության Հանդես Զաքարիա Քանաքեռցու հետաքրքրությունը պետք է պայմանավորել ոչ միայն երկու Հարևան ժողովուրդների դարավոր պատմական կապերով, այլև վրաց Հակապարսկական ապստամբությունների օրինակը Հայկական միջավայրում սերմանելու ձգտմամբ:

Զ. Քանաքեռցու «Պատմագրության» մեջ ուշագրավ տեղեկություններ կան պարսկական լծի դեմ Գեորգի Սահակաձեի գլխավորած ապստամբության վերաբերյալ: Վերջինիս սոցիալական պատկանելության վերաբերյալ Զ. Քանաքեռցին լռում է: Սակայն Հայտնի է, որ Գ. Սահակաձեն բարձրաստիճան ազնավուր էր և կրում էր «մեծ մոկրով» տիտղոսը: Գ. Սահակաձեի հեղինակության ու դիրքի բարձրացմանը նպաստել էր նաև այն հանգամանքը, որ նրա քույրը՝ Քարթլիի թագավոր Լուարսաբ II-ի (1592-1622) կինն էր: Արքան, սակայն, տուրք տալով Գ. Սահակաձեից դժգոհ վրաց իշխանների և Հատկապես իր ազգական Շաքիման Բարաթաշվիլու հորդորներին, նախ բաժանվում է կնոջից<sup>1</sup>, ապա նախկին աներորդուն սպանելու անհաջող փորձ է անում: Դրանից հետո Գ. Սահակաձեն 1612 թ. Հե-

<sup>1</sup> Տե՛ս Կուցիա Կ., Առաքել Դավրիժեցու տեղեկությունները Վրաստանի մասին, Թբիլիսի, 1974 (վրացերեն):

<sup>2</sup> Вахушти Багратиони. История царства грузинского, перевел, снабдил предисловием, словарями и указателем Н. Т. Накашугзе, Тбилиси, 1976, с. 49-50 (այսուհետև՝ Вахушти Багратиони).

<sup>3</sup> Парсадан Горгиджанидзе, История Грузии, перевод Р. Кикнагзе и В. Пугуридзе, исследование и указатели Р. Кикнагзе, Тбилиси, 1990, с. 71 (այսուհետև՝ Парсадан Горгиджанидзе); Առաքել Դավրիժեցի, Գիրք պատմութեանց, աշխատասիրությամբ Լ. Ա. Խանլարյանի, Ե., 1990, էջ 121:

<sup>4</sup> Вахушти Багратиони, с. 52; Առաքել Դավրիժեցի, էջ 122:

ռանում է իրան<sup>7</sup>: Նա հույս ուներ այդ երկրի զինված ուժերն օգտագործել իր հակառակորդներին հաղթելու և Քարթլին գրավելու համար: Հենց այդ նպատակով էլ Գ. Սահակաձեն 1615 թ. դեպի Քարթլի և Կախեթ կատարած արշավանքի ժամանակ, ուղեկցում է շահ Աբբաս I-ին (1587-1629): Շահը ձեռնարկում է Լուարսաբ II-ին և իր հետ տանում իրան<sup>8</sup>: Ձ. Քանաքեռցին այս իրադարձություններին չի անդրադառնում՝ նշելով, որ այդ մասին պատմում է Ա. Դավրիժեցին<sup>9</sup>:

Վրաստանն իրեն ենթարկելու մտադրությամբ 1625 թ. շահ Աբբաս I-ը Կարչիխա խանի և Գ. Սահակաձեի գլխավորությամբ բանակ է ուղարկում այնտեղ<sup>10</sup>: Ձ. Քանաքեռցին, սակայն, նշում է, որ շահը նրանց Վրաստանում էր թողել դեռևս 1615 թ. Կարչիխային հանձնարարելով Վրաստանը հպատակեցնելուց հետո գահ բարձրացնել Գ. Սահակաձեին<sup>9</sup>: Սակայն դա վրացական աղբյուրներով չի հաստատվում: Ըստ Վախուշտիի 1615 թ. շահ Աբբաս I-ին ուղեկցելով Վրաստան՝ Գեորգի Սահակաձեն մտահոգված էր միայն Քարթլիի գրավման խնդրով: Նա տեղյակ էր երկիրը նվաճելուց հետո այն մահմեդականացնելու շահի նպատակին: Վախուշտիի համաձայն՝ Գեորգի Սահակաձեն նույնիսկ շահին հորդորում է Վրաստան արշավել ձմռանը, որպեսզի եղանակային վատ պայմաններում բնակչությանը չհասցի լեռները փախչել<sup>10</sup>: Վերոհիշյալ վրաց պատմիչների պնդմամբ, երբ Գ. Սահակաձեն և Կարչիխա խանը 1625 թ. սկզբին ժամանեցին Վրաստան, երկրում իրանի դեմ համընդհանուր ապստամբություն էր սկսվել: Գ. Սահակաձեն, իմանալով այդ մասին, որոշեց իր ձեռքը վերցնել պայքարի ղեկավարությունը<sup>11</sup>: Թուրք պատմագիր Նայիման իր հերթին պնդում է, որ նա հակապարսկական ապստամբությունը ծրագրել էր նախօրոք համաձայնության գալով Կախեթի թագավոր Թեյմուրազ I-ի (1606-1648) հետ: Վերջինս պետք է դարանակալեր Վրաստանի նեղ կիրճերից մեկի մոտ այնտեղով անցնող պարսկական զորքին ջախջախելու համար<sup>12</sup>: Ի տարբերություն այս վկայությունների՝ Ձ. Քանաքեռցին դեպքերն այլ կերպ է ներկայացնում:

<sup>7</sup> Бердзенишвили Н., Дондуа В., Думбадзе К., Меликишвили Г., Месхиа III. История Грузии, т. I, с древнейших времен до 60-х годов XIX века, Тбилиси, 1962, с. 302 (այսուհետև՝ История Грузии, т. I).

<sup>8</sup> Զաքարիա Սարկաւազ, Պատմագրութիւն, հ. I, Վաղարշապատ, 1870, էջ 26: Պատմիչը Լուարսաբին սխալմամբ անվանում է Շավարսափ (Հայերեն ձեռագրերի ժե գարի հիշատակարաններ (1601-1620 թթ.), հ. I, կազմեցին՝ Վ. Հակոբյան, Աշ. Հովհաննիսյան, Ե., 1974, էջ 548):

<sup>9</sup> Զաքարիա Սարկաւազ, հ. I, էջ 26: Առաքել Դավրիժեցին իր երկի մեջ մի քանի անգամ հիշում է նվիրել Գեորգի Սահակաձեի ապստամբությանը նախորդած իրադարձություններին (տե՛ս Առաքել Դավրիժեցի, էջ 120-144):

<sup>10</sup> История Грузии, т. I, с. 301.

<sup>11</sup> Զաքարիա Սարկաւազ, հ. I, էջ 26:

<sup>12</sup> Вахушти Багратиони, с. 52-53.

<sup>13</sup> История Грузии, т. I, с. 302.

<sup>14</sup> Թուրքական աղբյուրները Հայաստանի և Հայերի մասին, հ. I, թարգմանությունը թուրքերեն բնագրերից, ներածությունը, ծանոթագրությունները, տեքմինա-

Խնդիրն այն է, որ շահ Աբբաս I-ը Կարչիխա խանին և Գ. Սահակաձեին հանձնարարել էր ոչնչացնել վրացի ազնավորներին և թավադներին: Դա պետք է տեղի ունենար Մուղրանում՝ Աղայան դաշտում<sup>13</sup>: Սակայն պարսիկների մտադրությունները չեն իրականանում: Շահ Աբբասը Կարչիխա խանին է ուղարկում գաղտնի նամակ, որի բովանդակությունը, ըստ Ջ. Քանաքեռցու, հետևյալն էր. «Ի Շահ-Աբասէ մալում լինի քեզ՝ Ղաուզդայ խան: Ձի յորժամ աշխարհդ Վրաց ընդ ձեռամբ քո արասցես, եթէ ինչ իւրք և է՝ ջանա՛ սպանանել զՄովրաւդ (Գեորգի Սահակաձեին - Վ. Ա.), զի մի՛ լիցի մեզ հակառակ, և կամ պակասութիւն ինչ թագաւորութեանս մերում»<sup>14</sup>: Այսպիսով, ըստ նամակի, Գ. Սահակաձեն ևս պետք է սպանվեր: Սակայն նամակն իր նպատակին չի ծառայում, քանզի ընկնում է վերջինիս ձեռքը: Վախուշտիի հաղորդմամբ՝ նամակի բովանդակությունից զայրացած Գ. Սահակաձեն սպանում է նամակատարին և գաղտնի այցելում Զուրաբ էրիսթավին՝ առաջարկելով կոտորել կզլբաշներին<sup>15</sup>: Ջ. Քանաքեռցու և վրաց պատմիչի վկայությունների համադրումից կարելի է եզրակացնել, որ Գ. Սահակաձեն ապստամբության չի ձգտել այնքան ժամանակ, քանի դեռ իր կյանքին և Վրաստանի թագավոր դառնալու հեռանկարին վտանգ չէր սպառնում: Ասվածի վառ ապացույցն է Ջ. Քանաքեռցու վկայություններից ևս մեկը: Անդրադառնալով շահական նամակի գաղտնագրածմանն ու նամակատարի սպանությունը՝ պատմիչը նշում է, որ զրանից հետո, հանդիպելով վրաց իշխանների հետ, Գ. Սահակաձեն խոստովանում է իր կողմից սեփական հայրենիքին դավաճանած լինելու հանգամանքը<sup>16</sup>:

Հասկանալով հապաղման վտանգը՝ Գ. Սահակաձեն, առանց ժամանակ կորցնելու, գործի է անցնում և 1625 թ. մարտի 25-ին գլխովին ջախջախում Մարտկոպիի դաշտավայրում տեղակայված պարսկական բանակը<sup>17</sup>: Անդրադառնալով այդ ճակատամարտին՝ Ջ. Քանաքեռցին գրում է. «Եվ կոտորեցին զնոսա (պարսիկներին - Վ. Ա.) որպէս մըջիւն ջերմ ջրով, եւ սպանին զՂաուզդայ խանն, զՅուսուփ խանն եւ զՂազաղ խանն»<sup>18</sup>: Պատմիչի այս հաղորդումը հաստատ-

բանական բառարանով և հավելվածով կազմեց՝ Ա. Խ. Սաֆրաստյան, Ե., 1961, էջ 85 (այսուհետև՝ Թուրքական աղբյուրները, հ. I):

<sup>13</sup> История Грузии, т. I, с. 302.

<sup>14</sup> Զաքարիա Սարկաւազ, հ. I, էջ 27, հմտ. Вахушти Багратиони, с. 56; Թուրքական աղբյուրները, հ. I, էջ 89: Առաքել Դավրիժեցին այս իրադարձությանը չի անդրադառնում, իսկ որպես Զաքարիա Սարկավազի աղբյուր հանգես է գալիս Ազլոց վանքից ոմն Պետրոս Արեղա (Զաքարիա Սարկաւազ, հ. I, էջ 28):

<sup>15</sup> Вахушти Багратиони, с. 56.

<sup>16</sup> Զաքարիա Սարկաւազ, հ. I, էջ 28:

<sup>17</sup> История Грузии, т. I, с. 303: Վրացի հեղինակների կողմից ավելի վաղ գրված աշխատություններից մեկում Մարտկոպիի ճակատամարտը սխալմամբ թվագրվում է 1623-ով (Бердзенишвили Н., Джавахишвили И., Джанашиа С. История Грузии, с древнейших времен до начала XIX века, под редакцией С. Джанашиа, ч. I, Тбилиси, 1946, с. 361 (այսուհետև՝ История Грузии, ч. I):

<sup>18</sup> Զաքարիա Սարկաւազ, հ. I, էջ 28:

վում է վրացական և հայկական աղբյուրներով<sup>19</sup>: Թվում էր, թե այս ճակատամարտից հետո ժողովուրդը թեկուզ կարճ ժամանակով պետք է աղատ շունչ քաշեր, սակայն Զ. Քանաքեռցու մի վկայությամբ պարզվում է, որ այն սկսում է բռնությունների ենթարկվել հենց հայրենակիցների կողմից: Պատմիչի խոսքերով՝ վրացի զինվորները սկսում են թալանել ոչ միայն պարսիկներին, այլև «զքրիստոնէից զինչսն կողոպտէին եւ մարդոյ չառնէին վնաս»<sup>20</sup>:

Մարտկոպիի ճակատամարտից հետո շահ Աբբաս I-ը Վրաստան է ուղարկում հատուկ զորքեր իր թիկնազորի պետ Իսա խանի<sup>21</sup> գլխավորությամբ: Մարաբդա գյուղի մոտ՝ Ալգեթ գետի ափին, 1625 թ. հուլիսի սկզբին կողմերի միջև տեղի է ունենում արյունահեղ ճակատամարտ, որում հաղթում են պարսիկները<sup>22</sup>: Ճակատամարտին մասնակցում էր նաև Երևանի խան Ամիրգունան, որին, Զ. Քանաքեռցու խոսքերով, մահացու վիրավորում է ունի աղա թանգի<sup>23</sup>: Այն փաստը, որ Ամիրգունան մասնակցել է Մարաբդայի ճակատամարտին, հաստատում է Փարսագան Գորգիջանիձեն: Ըստ նրա՝ Ամիրգունային վիրավորել է Թեյմուրազ I-ը<sup>24</sup>:

Զ. Մարկավագը, նկարագրելով Մարաբդայի ճակատամարտը, այնուհետև նշում է, որ դրանից հետո Գ. Սահակաձեն հեռանում է Թուրքիա: Սակայն իրականում նա Թուրքիա էր հեռացել 1626 թ. Բաղալեթի ճակատամարտում Թեյմուրազ թագավորին պարտվելուց հետո: Իսկ Մարաբդայի ճակատամարտից հետո Գ. Սահակաձեն հեռանում է Սամցխե՝ պայմանավորված պարսիկների՝ Քարթլի նոր ներխուժմամբ<sup>25</sup>: Տեսնելով, որ գեներալ միջոցով չի կարողանում հպատակեցնել Վրաստանը շահ Աբբաս I-ը ոռոսական դեսպանի միջոցով Թեյմուրազին հայտնում է պատերազմը դադարեցնելու, վրաց գերիներին վերադարձնելու և կախեթական թագավորությունը վերականգնելու իր մտադրության մասին: Ի վերջո, Աբբաս I-ը 1625 թ. Թեյմուրազ I-ին ճանաչում է Քարթլի-Կախեթի թագավոր<sup>26</sup>: Գ. Սահակաձեն, հավանաբար ցանկանալով տիրանալ վրաց գահին, Բաղալեթում կոչվում է Թեյմուրազի հետ և պարտվելով փախչում է Թուրքիա, որտեղ էլ սերասքեր խուսրե փաշայի հրամանով գլխատվում է<sup>27</sup>:

<sup>19</sup> Парсадан Горгиджанидзе, с. 77, Вахушти Багратиони, с. 56-57; Մանր ժամանակագրություններ (XIII-XVIII դդ.), հ. I, կազմեց Վ. Ա. Հակոբյան, Ե., 1951, էջ 145 (այսուհետև՝ Մանր ժամանակագրություններ):

<sup>20</sup> Ջաքարիա Սարկալազ, հ. I, էջ 28:

<sup>21</sup> Ջաքարիա Քանաքեռցին Իսա խանին անվանում է Շոռչի-բաշի: Սա պայմանավորված է այն հանգամանքով, որ վերջինս զբաղեցնում էր արքունի թիկնազորի հրամանատարի՝ կորչիբաշու պաշտոնը, որին էլ պատմիչը սխալմամբ վերոհիշյալ ձևով է կոչում (նույն տեղում, էջ 29):

<sup>22</sup> История Грузии, т. I, с. 303.

<sup>23</sup> Ջաքարիա Սարկալազ, հ. I, էջ 30:

<sup>24</sup> Парсадан Горгиджанидзе, с. 78.

<sup>25</sup> История Грузии, т. I, с. 303.

<sup>26</sup> Նույն տեղում, էջ 304, Ջաքարիա Սարկալազ, հ. II, էջ 94:

<sup>27</sup> Вахушти Багратиони, с. 61; Парсадан Горгиджанидзе, с. 83; Թուրքական աղբյուրներ, հ. I, էջ 59:

Թուրքիայի օգնությունն ապավինելով՝ 1631 թ. Թեյմուրազը պատերազմ է սկսում Իրանի դեմ: Շահ Աբրահամ II-ը (1642-1666) Քարթլիի իշխանությունը հանձնում է մահմեդականություն ընդունած Ռոստոմին (1633-1658), որն իրանական խոշոր զորաբանակով արշավում է Քարթլի: Թեյմուրազը 1632 թ. ստիպված հեռանում է Իմերեթիա, իսկ Ռոստոմը տիրանում է Քարթլիին: Սակայն իրադարձություններն այսքանով չեն ավարտվում: Թեյմուրազը 1634 թ. վերադառնում է Կախեթ և շուրջ 14 տարի կատաղի պայքար ծավալում Ռոստոմի դեմ<sup>28</sup>: Նա օգնության ակնկալիք ունեւր Ռուսաստանից, որի հովանավորության տակ էլ փորձում էր միավորել Վրաստանը: Սակայն դեպքերը դասավորվում են ի վնաս Թեյմուրազ I-ի: Վերջինիս նախ հրաժարվում է օգնել Ռուսաստանը, ապա արքայի ճամբարը լքում են նաև Քարթլիի նրան հետևած թավադները<sup>29</sup>:

Օգտվելով վերը նշվածից Ռոստոմը 1648 թ. իրանական զորքերով շարժվում է Կախեթ: Նրա և Թեյմուրազի զորքերի միջև վճռական ճակատամարտը տեղի է ունենում Մահարոյում: Թեյմուրազի բանակը գլխավորում էր նրա որդի Դավիթը, որը, Ձ. Քանաքեռցու խոսքերով «...խնայեաց ի ծերութիւն հօրն (Թեյմուրազին - Վ. Ա.), եւ ոչ եթող մտանել ի պատերազմ: Այլ ինքն մտեալ ի զգեստ պատերազմին՝ զինեցաւ ընդ դէմ նոցա»<sup>30</sup>: Ճակատամարտն ավարտվում է Ռոստոմի զորքերի հաղթանակով: Ձ. Քանաքեռցու վկայությամբ այս ճակատամարտում Դավիթը զոհվում է<sup>31</sup>:

Որդու մահից հետո Թեյմուրազը որոշում է շահ Աբրահամ II-ի հետ համաձայնության դալ և գնում է նրա մոտ: Վերջինս Թեյմուրազին ջերմ է ընդունում և նույնիսկ խոստանում Կախեթի գահին բարձրացնել նրա թոռ Հերակլին, եթե վերջինս ներկայանա իրեն և ճանաչի շահական իշխանությունը: Սակայն, քանի որ Հերակլը հապաղում է դա անել, Թեյմուրազին բանտ են նետում, որտեղ էլ 1663 թ. մահանում է<sup>32</sup>: Ձ. Քանաքեռցին այս դեպքերը մի փոքր այլ կերպ է ներկայացնում. շահը Թեյմուրազին սիրով ընդունելուց հետո Ռոստոմին նամակ է գրում՝ պահանջելով իշխանությունը հանձնել Թեյմուրազին: Վերջինս, ըստ հայ պատմիչի, մահանում է ոչ թե բանտում, այլ Կախեթի ճանապարհին: Բացի այդ, համաձայն Ձ. Քանաքեռցու, շահը Հերակլին հրավեր է ուղարկել Թեյմուրազի մահից հետո<sup>33</sup>:

Թեյմուրազ I-ից հետո Քարթլի-Կախեթի միանձնյա տիրակալ է դառնում անժառանգ Ռոստոմը: Գահաժառանգության խնդիրը լուծելու նպատակով նա որդեգրում է ոմն Լուարսաբի: Վերջինիս ինքնության վերաբերյալ Վախուշտի Բագրատիոնին, Փարսադան Գորդիջանիդեն և Ձ. Քանաքեռցին տարակարծիք են: Ըստ Վախուշտի՝

<sup>28</sup> История Грузии, ч. 1, с. 367-368.

<sup>29</sup> Նույն տեղում, էջ 369:

<sup>30</sup> Ձաքարիա Սարկաւազ, հ. II, էջ 94:

<sup>31</sup> Նույն տեղում, հմտ. Парсадан Горгиджанидзе, с. 108-109; Вахушти Багратиони, с. 67.

<sup>32</sup> История Грузии, ч. 1, с. 373.

<sup>33</sup> Ձաքարիա Սարկաւազ, հ. II, էջ 95:

Լուսարսաբը Քարթլիի նախկին տիրակալ Սիմոն Թագավորի թոռն էր<sup>34</sup>։ Փ. Գորգիջանիձեն նրան համարում է Ռոստոմի ազգականներից մեկի՝ Թեյմուրազ միրզայի որդին<sup>35</sup>, իսկ ըստ Զ. Քանաքեռցու՝ Լուսարսաբը Ռոստոմի որդին էր<sup>36</sup>։ Արժանահավատ է Փ. Գորգիջանիձեն, քանզի նա տասը տարեկանից մեծացել էր Ռոստոմի խնամակալու թյամբ և վերջինիս մտերիմներից էր<sup>37</sup>։

Որդեգրումից կարճ ժամանակ անց Լուսարսաբը որսի ժամանակ սպանվում է։ Այս իրադարձության հանգամանքների մասին Զ. Քանաքեռցին հաղորդում է մի տեղեկություն, որը հանդիպում ենք միայն Փ. Գորգիջանիձեի մոտ։ Զ. Սարկավագի համաձայն՝ որսի ընթացքում անզգուշորեն արձակված գնդակներից մեկը դիպչում է Թագաթառանգին, և նա մահանում է։ Կասկածյալներ են համարվում «Հայ Մամիկոնեան» ազգից համարվող Բայանգուր Թումանեցին (ըստ Փ. Գորգիջանիձեի՝ Բայանգուր Թումանիշվիլի) և Շիշուշ Բարթեցին (ըստ Փ. Գորգիջանիձեի՝ Սիառչա Բարատաշվիլի)։ Ռոստոմի հրամանով նրանց միջև տեղի է ունենում մենամարտ, որից հաղթող է դուրս գալիս Բայանգուրը<sup>38</sup>։ Վախուշտին տեղեկություն է տալիս միայն Լուսարսաբի վիրավորվելու և մահվան մասին, սակայն այս մենամարտին չի անդրադարձնում<sup>39</sup>։ Հետաքրքիր է հատկապես այն հանգամանքը, որ վրաց պատմիչները Լուսարսաբի մահվան տարին չեն նշում, մինչդեռ Զ. Քանաքեռցին այն թվագրում է 1650-ով<sup>40</sup>։ Մեզ է հասել եփրեմ Ա Ձորագեղցի կաթողիկոսի (1809-1830) անունից էջմիածնի վեց արքեպիսկոպոսների և երկու վարդապետների ստորագրած և անձնական կնիքներով վավերացրած «Տոհմականութիւն եւ ճիւղաբանութիւն Մամիկոնեանց, որք կոչին այժմ Թումանեանք» վերնագրով կոնդակը, որտեղ, հիմնականում հիմնվելով վերոհիշյալ մենամարտի վերաբերյալ Զ. Քանաքեռցու վկայությունների վրա, Թումանյանները համարվում են Մամիկոնյան իշխանական ընտանիքից սերված<sup>41</sup>։ Լուսարսաբի մահից հետո Ռոստոմը որդեգրում է նրա եղբայր Վախթանգին<sup>42</sup>, որին Զ. Քանաքեռցին համարում է Բագրատունի<sup>43</sup>։ Քանի որ գահակալությունն օրինական կա-

<sup>34</sup> Вахушти Багратиони, с. 67.

<sup>35</sup> Парсадан Горгиджанидзе, с. 101.

<sup>36</sup> Ջաֆարիա Սարկավագ, հ. II, էջ 96:

<sup>37</sup> Парсадан Горгиджанидзе, с. 11.

<sup>38</sup> Այս մենամարտում, իբրև գործից հայի, Փարսաղան Գորգիջանիձեի համակրանքը հայազգի Բայանգուրի կողմն է (Մելիքսեթ-Քեկ Լ., Վրաց աղբյուրները Հայաստանի և Հայերի մասին, քաղվածքներ վրացերեն բնագրերից Հայերեն թարգմանությամբ, ներածություն – ծանոթություններով և հավելվածներով, հ. II (ԺԳ – ԺԸ գար), Ե., 1936, էջ 83): Ջաֆարիա Սարկավագ, հ. II, էջ 96-98, հմտ. Парсадан Горгиджанидзе, с. 120-121.

<sup>39</sup> Вахушти Багратиони, с. 67.

<sup>40</sup> Ջաֆարիա Սարկավագ, հ. II, էջ 98:

<sup>41</sup> Մելիքսեթ-Քեկ Լ., Թումանյանների ծննդաբանությունը եւ եփրեմ կաթողիկոսի 1813 թվի «Կոնդակը» (Պատմա-բանասիրական պրպտումներ, աշխատասիրություններ Գ. Մուրադյանի, Ս. էջմիածին, 2010, էջ 125-133):

<sup>42</sup> Парсадан Горгиджанидзе, с. 121.

<sup>43</sup> Ջաֆարիա Սարկավագ, հ. II, էջ 98:

րող էր Համարվել միայն շահական Համապատասխան հրամանով, Վախթանգը 1658 թ. Ռոստոմի մահից անմիջապես հետո, մեկնում է շահ Աբրահ II-ի մոտ: Սակայն նախքան Վախթանգի արքայական իրավունքները հաստատելը, շահը նրան ստիպում է մահմեդական-նուսթյուն ընդունել, որից հետո կոչվում է Շահնավազ (1658-1676)<sup>44</sup>: Այս մասին Ջ. Քանաքեռցին դրոմ է. «Եւ յետ սակաւուց մեռաւ նա. իսկ Վաղթանկն առեալ ընդ իւր բազում ազատ որդիս՝ եւ գնաց առ Սանի-Աբաս թագաւորն Պարսից՝ որ է փոքր Շահ-Աբաս. ընկալաւ ի նմանէ զիշխանութիւնն, եւ անուանեցաւ Շահ-Նաֆաս, որ է Շունչ արքայի»<sup>45</sup>: Այն փաստը, որ Վախթանգը շահի մոտ է մեկնել Ռոստոմի մահից հետո, հաստատում է նաև Փ. Գորգիջանիձեն<sup>46</sup>: Ի տարբերություն Ջ. Քանաքեռցու և Փ. Գորգիջանիձեի Վախթանգի մեկնումը շահի մոտ Վախուշտին ներկայացնում է Ռոստոմի կենդանության օրոք՝ 1653 թ. ամռանը<sup>47</sup>, որը ճիշտ է:

Շահնավազը նպատակադրվել էր միավորել Քարթլին և մյուս վրացական թագավորություններն ու իշխանությունները: Նրա ջանքերով 1661 թ. դրությամբ նվաճվել էին Իմերեթը, Կախեթը և Քութայիսին<sup>48</sup>: Բնականաբար, սա էլ կարող դուր գալ շահ Աբրահ II-ին հաջորդած շահ Սուլեյմանին (1666-1694), որը Շահնավազին կանչում է արքունիք՝ հաշվետվություն տալու: Ջ. Քանաքեռցին սա համարում է Շահնավազի հանդեպ չարախոսության արդյունք<sup>49</sup>: Սակայն շահի մոտ մեկնելու ճանապարհին խոչըարում, Շահնավազը 1676 թ. մահանում է՝ գահը թողնելով իր որդի Գեորգի XI-ին (1676-1688)<sup>50</sup>: Ջ. Քանաքեռցու վկայությամբ Շահնավազը կյանքին վերջ է տվել ինքնասպանությամբ՝ վախենալով շահական պատժից<sup>51</sup>: Նույնն է պնդում նաև Ջաքարիա Ադուլեցին<sup>52</sup>: Ի տարբերություն հայ պատմիչների՝ Փ. Գորգիջանիձեն և Վախուշտին Շահնավազի մահը հիվանդության հետևանք են համարում<sup>53</sup>: Հավանաբար, վրաց պատմիչները չեն ցանկացել ընթերցողին ի ցույց դնել իրենց արքայի թուլակամությունը, որը դրսևորվեց շահական անխուսափելի պատժից ազատվելու ելքն ինքնասպանության մեջ փնտրելով:

Գեորգի XI-ը շարունակում է երկրի միավորման հոր քաղաքականությունը: Վրաստանի միավորման գործում և պարսկական լծի դեմ պայքարում նրան սատարում էին վրաց իշխաններից ոմանք արքա-

<sup>44</sup> Парсадан Горгиджанидзе, с. 127.

<sup>45</sup> Ջաքարիա Սարկաւազ, Հ. II, էջ 95:

<sup>46</sup> Парсадан Горгиджанидзе, с. 127.

<sup>47</sup> Вахушти Багратиони, с. 68.

<sup>48</sup> Նույն տեղում, էջ 69-70:

<sup>49</sup> Ջաքարիա Սարկաւազ, Հ. II, էջ 98-99:

<sup>50</sup> Ջաքարիա Ադուլեցի, Օրագրութիւն, Ե., 1938, էջ 140, Մանր ժամանակագրություններ (XIII-XVIII դդ.), Հ. I, էջ 289, Հմմտ. Вахушти Багратиони, с. 75; Парсадан Горгиджанидзе, с. 135.

<sup>51</sup> Ջաքարիա Սարկաւազ, Հ. II, էջ 99:

<sup>52</sup> Ջաքարիա Ադուլեցի, էջ 140:

<sup>53</sup> Вахушти Багратиони, с. 75; Парсадан Горгиджанидзе, с. 135.

յի եղբայր Արչիլի գլխավորությամբ, որն արդեն տիրում էր Իմերեթիային<sup>54</sup>:

Զ. Քանաքեռցին Գեորգի XI-ի գլխավորած հակապարսկական քաղաքականության դրսևորումը սխալմամբ վերագրում է ավելի ուշ գահակալած շահ Սուլթան Հուսեյնի (1694-1722 թթ.) ժամանակաշրջանին: Բացի այդ, ճիշտ չի ներկայացնում նաև նրա կենտրոնախույս ձգտումների պատճառը: Զ. Քանաքեռցու հաղորդմամբ՝ հակապարսկական այս քայլերի պատճառը Գեորգի XI-ի դատեր հանդեպ շահ Հուսեյնի հավակնություններն էին<sup>55</sup>:

Շահ Սուլեյմանը որոշում է Գեորգիի փոխարեն Քարթլիի թագավոր նշանակել Թեյմուրազ I-ի թոռանը՝ Հերակլին, որն արդեն 14 տարի Սպահանում էր: Վերջինս ընդունում է մահմեդականություն՝ ստանալով Նազար-Ալի անունը<sup>56</sup>: Այս իրադարձության մասին Զ. Քանաքեռցին գրում է: «Իսկ Շահն ... ետ նմա (Հերակլին — Վ. Ա.) խանութին Թիֆլիզոյ, եւ անուանեաց զնա Վալի-խան, և մեծաշուք փառօք առաքեաց ի Տփլիս»<sup>57</sup>: Հերակլին անվանելով «Վալի-խան»՝ պատմիչն արժեքավոր տեղեկություն է տալիս Վրաստանի արքաների կարգավիճակի մասին: Խնդիրն այն է, որ «վալի» էին կոչվում Վրաստանի այն թագավորները, որոնք իրական իշխանությունն չունեին և համարվում էին պարսից շահի փոխանորդները<sup>58</sup>:

Հերակլը վրացական գահ է բարձրանում 1688 թ.<sup>59</sup>՝ իշխելով մինչև 1703 թ.<sup>60</sup>: Ինչպես Զ. Քանաքեռցին է վկայում, Հերակլի գահակալումը Վրաստանում մեծ դժգոհություն է առաջացնում ինչպես վրացիների, այնպես էլ հայերի շրջանում: Պատմիչի խոսքերով՝ նորանշանակ արքան մի շարք սահմանափակումներ է դնում եկեղեցական արարողությունների վրա, որի հետևանքով «միաբանեցան քրիստոնեայքն՝ Հայք եւ Վիրք, եւ գրոհս տուեալ գնացին ի դուռն նորա, եւ աղաղակելով պախարակէին, եւ այպանէին՝ ասելով, դու ուրացար զհայրենի հաւատն քո»<sup>61</sup>: Վախուշտին ուղղակիորեն չի խոսում Հերակլի հակաեկեղեցական քաղաքականության մասին: Նա նշում է, որ իշխանության գալով՝ վրաց արքան պաշտոնազրկում է բազմաթիվ բարձրաստիճան հոգևորականների, այդ թվում՝ կաթողիկոսին՝ նրանց փոխարեն նշանակելով իրեն հավատարիմ մարդկանց<sup>62</sup>: Թեև Վախուշտին չի նշում նորանշանակ հոգևորականների ապօրինությունների մասին, սակայն պետք է ենթադրել, որ մահմեդական արքան ամենայն հավանականությամբ վերջինս

<sup>54</sup> Вахушти Багратиони, с. 77.

<sup>55</sup> Զաքարիա Սարկաւազ, Կ. II, էջ 99:

<sup>56</sup> Вахушти Багратиони, с. 80.

<sup>57</sup> Զաքարիա Սարկաւազ, Կ. II, էջ 100:

<sup>58</sup> История Грузии, т. I, с. 303.

<sup>59</sup> Вахушти Багратиони, с. 81.

<sup>60</sup> Նույն տեղում, էջ 92:

<sup>61</sup> Զաքարիա Սարկաւազ, Կ. II, էջ 101-102:

<sup>62</sup> Вахушти Багратиони, с. 81.

րիս միջոցով իրականացրել է հակակեղեցական այն քաղաքականությունը, որի մասին վկայում է Ջ. Քանաքեռցին:

Ամփոփելով Վրաստանի XVII դ. պատմության վերաբերյալ Ջ. Քանաքեռցու «Պատմագրության» վկայությունները, կարող ենք նշել, որ այն, չնայած իր որոշ փաստական վրիպումներին, իրադարձությունների օբյեկտիվ լուսաբանմամբ և պատմական արժեքավոր տեղեկությունների ընդգրկմամբ կարելի է դասել վաղ ուշմիջնադարյան պատմության կարևոր սկզբնաղբյուրների թվին: Այս երկի վկայությունների արժանահավատության ուղղակի հաստատումը պետք է համարել այն կարևոր հանգամանքը, որ իրադարձությունների մեծամասնության նկարագրման համար պատմիչն օգտվել է ականատեսների վկայություններից: Չերժ մնալով վրացական պալատական ներքողական պատմագրությանը բնորոշ թերություններից ու կողմնակալությունից՝ Ջաքարիա Քանաքեռցին բավարարվել է Վրաստանի XVII դ. ազատագրական պայքարի վերաբերյալ փաստերի պարզ արձանագրումով՝ հետագա վերլուծությունները թողնելով ընթերցողին:

ВОПРОСЫ ИСТОРИИ ГРУЗИИ XVII ВЕКА  
В КОНТЕКСТЕ "ХРОНИКИ" ЗАКАРИЯ КАНАКЕРЦИ

ВИРАБЯН А. С.

Резюме

Труд Закария Канакерци содержит ценные данные о восстании против персидского ига под предводительством Георгия Саакадзе. Свидетельства историка подтверждают, что Георгий Саакадзе не преследовал цель освобождения грузинского народа от персидского ига.

"Хроника" служит важным источником изучения периода правления царей Ростом (1633-1658), Шахнаваза (1658-1676), Георгия XI (1676-1688), Геракла I и политических перипетий этого исторического отрезка.